

"Lotería Primitiva" eta euskara

El Mundo del País Vasco, 1991-07-06.

Esan dezadan lehenik, "Lotería Primitiva" jokatzeko delako sortu zenetik gure familian; oraindik ez gara aberastu, baina egunen batean irtengo da gure zenbakia, ziur gaude! Bestela ez genuke astean bi aldiz erosten jarraituko!, orain ostegun eta larunbatetan. Iragarkiak dioten bezala. Neuk anuntzio hau EL MUNDO DEL PAIS VASCO eta *Euskaldunon Egunkarian* irakurri dut: lehenengoan erdaraz, eta bigarreanean... ere bai, erdaraz. Pentsatu dut ez dela Loteria-ko zuzendaritza konturatu, euskaldunak garen milaka pila batzuek irakurri izango genuela estreinatu berria dugun egunkarian euskaraz etorri izan balitz, zeren eta euskaldun garenok hain baztertuta eta zigortuta izan den geure hizkuntzan ahalegin bat egitea hunkigarri gertatzen baitzaigu. Iragarkiaren teknikaz zerbait dakienak badaki bakoitzari bere hizkuntzan egiteak zein eragin baikorra duen. Eta kontrakoak zenbat kalte egin diezaioketen. Euskaldunok erdaraz ere irakurtzen ditugu iragarkiak, noski, bietara ohituak gara eta, baina euskaraz hobe. *Euskaldunon Egunkarian* bereziki. Eta "Lotería Primitiva"ren kausan, geure etxeetan egunero amesten jartzen gaituen sariketaren mezuak euskaraz jasotzeak asko poztuko gintuzke!

Galdetu egin dut, neronek, *Egunkarian*, eta neuk bezala beste irakurle askok, zergatik hautsi den bertan orain arte gorde duen araua. Ez da egunkariaren zabarkeria izan. Loteria beraren ohizkoa, nonbait. Halere, usadio berriak hartzen legezko da. Eusko Autonomiako Lurraldean euskara hizkuntza ofiziala delako; eta kasu honetan legezketasun hori "Lotería Primitiva"rentzat onuragarri ere gerta daitekelako.